

Tañtaña tsghatá lwa Pwal ña 1 Timute

Gazgu

¹ I'i Pwal, ghunatá mnda Yesu Kristi, manda ya mnaf Lazglafta mnda mba amu nda Yesu Kristi ya faf mu ta ghəñ tida ta vinda na delewer na.

² Ña kagha Timute*, vərda zwanja da ma zlg hay nda ñuduf ta vinda yu. Ka vlaghavla Lazglafta ta nzakway ka Da, nda Mghama mu Yesu Kristi ta zđakatahudani, nda tawa hidahidani, nda zđakwani.

Dasuwa ka kuni nda gwal ta taghanatá ghwadaka skwi ta mndu

³ Manda ya si ta mnə yu ña gha ma sli'a da da luwa Mekaduniya ya kay, ka nzata ka ma luwa Afisus, kabga mamu gwal ta tagha tsakalawi ña mnduha. Ka dvanaghata ka ta həñ ña zlanja tañ. ⁴ Ka mnanata ka ta həñ, yaha həñ da laghwi da hamtá ghəñ ma gwada ta prukutunzum, nda mbəda mndəra mndu kul had lu dza'a kdanakta. Ta klaktá hwazlađaku, ka zlanja ñlaku ta kəma ta kəma ma slna Lazglafta ma zlg hay nda ñuduf tsaha ya. ⁵ Klatá ghəña tsa gwada ta mnaghata yu ya ná, tsaya sli'anaftá dvu ya ta sabi ma ñuduf ya nda ghuba, nda vərda ndanu kul had sana dga ghəñ, nda vərda zlg hay nda ñuduf. ⁶ Tsughwadaghu tsughwada sanlaha ta tvi, ka laghwi zadamta ma tsa hwazlađakuha dza'a

* **1:2** Ngha ta slna gwal ghunay 16:1.

kwál katanaf́tá hən̄j ya. ⁷ Ta kumay hən̄j ta nzakway ka gwal ta taghanaftá zlahá Lazglafta ta mnduha, ama sna a vərđá hahən̄j ta skwi ta mnə hən̄j wa. Sna a hən̄j ta vərđá skwi ya sladaf hən̄j tida guli wa.

⁸ Nda sna amu kazlay: Dina zlahu kə'a, ka nda tvani ksa mndu ta slna nda tsi. ⁹ Nda sna amu guli kazlay: Fa a lu ta zlahu ka ɲa gwal tđukwa wu kə'a, ama fafa lu ta zlahu ɲa gwal kul sna gwada da mndu, nda gwal ta maga mbrəs, nda gwal ta sidi, nda gwal dmaku, nda gwal kul zləɲa Lazglafta, nda gwal kul snan̄tá dzahay', nda gwal ta pslatá dadaha tan̄j, nda gwal ta pslatá mndu, ¹⁰ nda gwal ta hliri, nda gwal ta hahanaku zgun nda zgun, nda gwal ta dzawaptá mndu ka vu'a, nda gwal tsakalawi, nda gwal ta wada a ta wadu ka bətbət, nda ya ɲa gwal ta maga sanlaha ma ghwadaka skwiha, ka zluɲtá vərđaka tagha skwi. ¹¹ Tsa vərđá tagha skwi ya ná, ta slanaghata ma Lfida Gwada fadim lu ɲa mnay ta ghəɲa glakwa Lazglafta lu.

Rfanaghatá Kristi

¹² Ta rfay yu ta Yesu Kristi Mghama mu, ta vlihatá mbraku prək maga slna da. Ta rfay yu ta ghəɲa vəl klaftani ta i'i ka mndu nda ra ɲa faftá ghən̄j tida, ɲa maganata slna. ¹³ An̄j mndani, nda nza yu ka mndu si ta pgha rutsak tida ghalya, ka mnda giri ɲani, ta balanata, ama ka tawatá Lazglafta ta hidahida ta i'i, kabga ma kwala da kul snan̄ta si ta maga† yu ta tsa skwiha ya. Si had̄ zlgħay nda ɲuduf da i'i wa. ¹⁴ Ka zdid̄ɲtá Mghama mu ta hudi katakata, ka vlihatá zlgħay nda ɲuduf, nda d̄vu ya ta mutsu lu ma guyatá vgha

† **1:13** Ngha ta slna gwal ghunay 8:3, 9:4-5.

nda Yesu Kristi. ¹⁵ Wya tsa vərda gwada nda ra ka tsu'afta inda mndu ya: Sasa Yesu Kristi ta ghəŋa hadik ŋa mbanafťá gwal dmaku. I'i mali mataba taŋ. ¹⁶ Tsaya kəl Lazglafta ka tawatá hidahida ta i'i. Kumanċkuma Yesu Kristi ta maravata ma i'i ta nzakway ka mali mataba gwal dmaku ya, ta glakwa ksa ŋudufani. Nda nza ka gray ŋa gwal dza'a zlghaftá tsatsi, ŋa nzakwa taŋ nda rfu ŋa kdekeden. ¹⁷ Ka nza sgit nda glaku ŋa dekdek ŋa Mgham kul had ta mtavata, kul had ta nghavata, tsatsi turtuktuk Lazglafta ŋa kdekeden. Amin!

¹⁸ Timute zwaŋa da, na gwada ta mnaghata yu ná, manda va ya mna la anabi ta gwada ta ghəŋa gha ghalya ya, ŋa nzakwa na gwada na ŋa vlaghatá mbraku, kada laviŋta ka ta vulaftá vərđaka vulu. ¹⁹ Nanaŋa ta zlghay nda ŋudufa gha nda fatá ndana gha kul had sana dga ghəŋ. Vziŋvza sanlaha ta tsa fata ndanu kul had dga ghəŋ ya, ka dzatá zlghay nda ŋudufa taŋ. ²⁰ Mataba tsa mnduha ya na i Himene nda Alegzandra. Vlaŋvla yu ta həŋ ta halaway†, kada kwala həŋ razəgəltá Lazglafta.

2

Na wa rakwa tsəlbay mu ta tsəlbə na?

¹ Skwi ya vli yu ta mbraku taŋtaŋ ta ghəŋani karaku ná, tsaya dawa skwiha da Lazglafta nda maga du'a, nda taw ma ghuvani, nda rfanaghata ta ghəŋa inda mnduha. ² Dina ka maga du'a ta ghəŋa mghamha nda inda gwal ta ŋanatá ga mgham, kada mutsafta mu ta nzaku leštekw, ma

† **1:20** Gray nda 1 La Kwareŋt 5:5, 2 Timute 2:17, 2 Timute 4:14.

zđaku, ma zləŋa Lazglafta nda tvani, ŋa nzay mu ta nzaku manda ya ta raku dər ta wati ma tvi tsi. ³ Tsaya skwi dīna ta zđəganatá Lazglafta mnda mba amu. ⁴ Ta kumay tsatsi ta mbafta* inda mndu, ka mutsafta tan̄ ta snaŋtá kahwathwata. ⁵ Na nzakwani ná, turtuktuk Lazglafta. Turtuktuk mndu ta guyanaftá mndu nda Lazglafta guli. Tsa mndu ya ná, Yesu Kristi ya ⁶ ta vlatá ghəŋani ŋa varatá inda mnduha demdem†. Tsaya skwi ya maga tsi ma fitik ya fa Lazglafta. ⁷ Ŋa tsaya kəl lu ka fatá i'i ka mnda mnay, ka mnda ghunay‡ guli. Nda nza yu ka mnda taghanaftá gwal kul nzakway ka la Yahuda§ ta gwada ta zlgħay nda ŋuduf, nda kahwathwata. Tsakalawa da a wu, kahwathwata ta mnə yu.

Imi'aha nda zgwana

⁸ Ta kumay yu tama ta magay zgwana ma inda vli ta du'a nda kapatá dzvu ya nda ghuḅa hezle' nda ta luwa, nda gatá sidi a wu, nda zlərdəwi a guli wa.

⁹ Ŋa mi'aha ya guli ná, ka nzakwa hahəŋ nda hba vgha manda ya ta raku. Ma laghu həŋ da rka nda datá ghəŋ ya nda bla. Ma laghu həŋ da rka nda dasu, dər nda mizidikw, dər nda lgut ya nda bla dzvani* a tsi. ¹⁰ Ka rka həŋ ta rka nda ŋərmata slnaha tan̄, manda ya ta ran̄ta mi'aha ta maran̄tá zləŋay tan̄ ta Lazglafta. ¹¹ Ma fitika tagha skwi ya guli, seftekwa ka marakw nzata, nda hanatá ghəŋ.

* **2:4** Gray nda Izekiyel 18:23. † **2:6** Gray nda Mata 20:28.

‡ **2:7** Gray nda 2 Timute 1:11. § **2:7** Gwal kul snaŋtá Lazglafta Da mu ta Luwa. * **2:9** Gray nda 1 Piyer 3:3.

¹² Vlaŋ a yu ta tvi ta marakw ŋa taghanaftá skwi, dər ŋa ga mgham ta ghəŋa zgun wa. Seftekwa katsi nzata. ¹³ Adamu na taŋtaŋa mndu zlaganap Lazglafta, kada magaftá tsi ta Hawa. ¹⁴ Adamu a nanaf halaway guli wa, marakw ya nanaf tsi, ka kwalaghutá marakw ta snatá gwada Lazglafta†. ¹⁵ Dər má mantsa tsi, dza'a mbanafmba Lazglafta ta marakw nda ma yayni ta zwani, ka gdavagda tsi ta ŋavata ma zlghay nda ŋudufani, nda dvutá mndu, nda nzaku nda ghuḅa.

3

Gwal ngha Igliz

¹ Nana gwada dza'a yu mnay na ná, gwada ŋa faftá ghəŋ tida ya. Ka dvafdva mndu ta slna nzakw ka mali ta ghəŋa Igliz katsi ná, ŋərma skwi ya dvan tsi. ² Dina ka nzakwa mali ta ghəŋa Igliz, ka mndu kul had rutsak tida, turtuk ka markwani, zlahafzlahá katsi ta ghəŋani, ta ndanay katsi ta ndanu tdukwa, dina ka nzakwani, ta tsu'ay katsi ta matbay ga taŋ, nda sna katsi ta taghanaftá skwi ta mndu, ³ ma nza tsi ka mndu ta sa ima inabi, ma nza tsi ka mndu ta sidi, ama leḅtekw ka nzakwani. Ma nza tsi ka mndu ta ghazenzen, ma nza tsi ka mndu dvutá ta tsemi. ⁴ Nda sna katsi ta ŋanatá həgani, nda sna katsi ta zlahá zwanani ŋa nzakwa taŋ ka zwani ta sna gwada nda hanata ghəŋ guli. ⁵ Ka si sna a mndu ta ŋanatá həgani wu katsi, wa kə'a dza'a laviŋtá nghaftá Igliza Lazglafta na? ⁶ Ma nza tsa mndu ya ka lfida mndu ma zlghay nda ŋuduf, da glə tsi ta ghəŋ, da zləmbamtá tsi

† **2:14** Aya 13-14: Ngha ta Zlrafta 2:7, 21-22, 3:1-6.

ma mndærga tsa guma tsanagha lu ta halaway ya. ⁷Dina ka nzakwani ka mndu ya ta ghubu dær gwal kul snaŋtá Lazglafta, kada nzakwa tsi ka mndu kul hađ lu ta gagay nda gaga, da zlämbamtá tsi da dæbla halaway*.

Gwal ksa slna ma sæla mnduha

⁸Gwal ta ksa slna ma sæla mnduha ya guli, dina ka nzakwa taŋ. Yaha hæŋ pgha wirak his ma vu, yaha hæŋ nzakway ka gwal ta sasaku, ka gwal ta zba tsemi nda ta ghwadaka tvi. ⁹Dina ka nzakway taŋ ka gwal ta ŋanatá kahwathwata ya marigin lu ma zlgħay nda ŋuđuf nda fata ndanu kul hađ sana dga ghæŋ. ¹⁰Dina ka dzæghaŋtá hæŋ karaku. Tahula tsa, ka hađ sana skwi ŋa mnafta ta hæŋ wu katsi, laviŋlava hæŋ ta nzakway ka gwal dza'a ksa slna ma sæla mnduha. ¹¹Mantsa ya mi'aha ta ksa slna ma sæla mnduha guli. Dina ka nzakwa taŋ. Hađ wu ka hæŋ ta kusleberaku, zlahafzlaha ka hæŋ ta ghæŋa taŋ, ka ŋærmani ka hæŋ nzakway ma inda skwi. ¹²Mndu ta ksa slna ma sæla mnduha ná, turtuk ka markwani, pærdæfpærdæ katsi ta zlaha zwanani nda gwal ga taŋ tani. ¹³Ka nda tvani ta ksa gwal ta ksa slna ma sæla mnduha ta slna katsi ná, ta vlaŋvla lu ta glaku ta hæŋ ma inda vli. Laviŋlava hæŋ ta gwada taŋ kul hađ zläŋ ma fatá ghæŋa taŋ ma zlgħay nda ŋuđuf ma Yesu Kristi.

Hya skwi ta vlamata zlgħay nda ŋuđuf

¹⁴Ta vindi yu ta na delewer na ŋa gha ná, nda fa ŋuđufa dá ta labæ da nghaghaghata. ¹⁵Ala, ka gærdugærdæ yu katsi, dza'a nda sna ka káka dza'a

* **3:7** Aya 2-7: Gray nda Titus 1:6-9.

nzaku ma həga Lazglafta ta nzakway ka Igliz,
 hahəŋ gugudí ta dihanatá kahwathwata. ¹⁶ Manda
 va tsaya ná, dagala nzakwa skwi ya nda dífa payaf
 Lazglafta,
 ta nzakway ka Kristi ya zlg haf mu.
 Marigin mara Lazglafta ka mnda səla. Tudúkwa
 nzakwani,
 ka Sulkum nda ghuḅa† maraŋta.
 Nda ngha duhwalha Lazglafta, ka mnə lu ta
 gwada tida, ŋa inda gwal kul nzakway ka la
 Yahuda.
 Ka zlg haftá mnduha ma inda vli ta ghəŋa hadik.
 Ka klaghatá Lazglafta ta luwa da vla glakwani.

4

Tagha skwa gwal tsakalawi

¹ Tsalinṡsala Sulkum nda ghuḅa kazlay: Ma
 kdavakta fitik ná, dza'a zlanavazla sanlaha ta
 zlg hay nda ŋudufa taŋ, ka laghwí da sna ŋa
 sulkumha ta nana mndu, nda tagha skwi ya ta kla-
 gapta ghwadaka sulkumha kə'a. ² Ŋa nanaghata
 gwal ta maga madgwirmadgwir, ta mna tsakalawi,
 ta həŋ. Vli ma ndana tsa mnduha ya ná, manda
 datá kufur ghandand ma vu ya nzakwani. ³ Dza'a
 lmay həŋ ta kla marakw, dza'a lmay həŋ ta zay
 lu ta sanlaha ma skwa zay. Wya Lazglafta ta
 zlagiginṡá tsa skwiha ya ŋa zay gwal zlg hay nda
 ŋuduf, gwal nda sna ta kahwathwata. Ta zə həŋ
 ya, ŋa rfay taŋ ta Lazglafta ta ghəŋani. ⁴ Manda
 va tsaya, inda skwi zlagigin Lazglafta ná, dina*
 nzakwani. Ka ta rfanagharfa lu ta Lazglafta ta

† **3:16** Gray nda Ruma 1:4. * **4:4** Gray nda Zlrafta 1:31.

ghəŋa skwi ta zə lu, haɗ sana skwi ŋa wudanaghuta wu, ⁵ kabga ghuβiŋ ghuβa Lazglafta nda gwadani nda ya nda ma maga du'a guli.

Nzakway ka vərɗa mnda maganata slna ta Yesu Kristi

⁶ Ka taghanaftagha ka ta inda tsa skwiha ya ta zwanama katsi, dza'a nzakway ka ka ŋərma kwalva Yesu Kristi. Dza'a maraŋmara ka kazlay: Nda bagha ka nda gwada zlghay nda ŋuduf, nda ya nda vərɗaka tagha skwi ya taghaf ka kə'a. ⁷ Zluŋzla ta gwada prukutunzumha ta gwadə halata mi'aha. Navaŋa kagha, ka nza ka ta nzaku ma ndi'ata vgha gha nda Lazglafta. ⁸ Skwi dina zavzava ŋa hwaya us ma vgha, ama sira a katu mida wa. Ndi'ata vgha nda Lazglafta katək na vərɗa skwi ta kata mndu ma inda skwi, kabga da tsatsi na ta ta imi ta sləməŋ ta ghəŋ nzaku ya ndanana, nda nzaku ya ta kəma. ⁹ Nana gwada na ná, vərɗa gwada ya, nda ra ka tsu'afta inda mndu kul haɗ sana dzudzukway. ¹⁰ Taghəŋa tsaya ta kəl mu ka dzatá vgha ka ŋavata ka maga slna, kabga nda fa ghəŋa mu ta Lazglafta ya nda hafu mida. Tsatsi ta nzakway ka mnda mba inda mndu, katkatatani gwal zlghay nda ŋuduf. ¹¹ Tsaya skwi dza'a ka sladanata, ka taghay.

Nzanza ka mndu ŋa ksa sadani

¹² Yaha mndu da hərtətata nzakwa gha ta ka zwaŋ. Katək ná, nzanza ka ŋa gwal zlghay nda ŋuduf, ka mndu ŋa kla sadani ma tva gwada, ma tva nzaku, nda ya ma tva nzaku nda ghuβa. ¹³ Ma kdaku yu ka labə ya, ka gɗata ka ta dzaŋanaftá

gwada† Lazglafta ta mnduha, ka vla ka ta mbraku
 ɲa taɲ, ka tagha ka ta skwi ɲa taɲ. ¹⁴ Yaha ka
 da ganavatá masfa ta skwi ya vlagha Sulkum ma
 kagha, ya vlagha lu ma fitika mnata la anabi, ka
 faghaghatá la galata mndu ta dzvu ya. ¹⁵ Ɗafɲa ta
 vgha ta tsa skwiha ya, ka maga ka nda kdavakta
 ɲudufa gha, ɲa nghanɲa inda mnduha káka ta dza'a
 ta kəma ta kəma. ¹⁶ Dasuwa ka ka nda nzakwa
 gha, dasuwa ka ka nda skwi ta taghə ka guli.
 Ndi'amndi'a mida. Ma tsa magay gha mantsa ya,
 dza'a mbanafɲa ka ta ghəɲa gha, nda gwal ta fata
 sləmənɲ ka snay tani.

5

Vla ta hidaku ɲa inda gwal zlgɲay nda ɲuduf

¹ Ma davə ka ta glata mndu. Nda dasuwa ká ka
 gwada nda tsi, manda skwi nda da gha*. Manda
 mna gwada ɲa zwanama gha ka ka gwada nda
 zwana duhwalha. ² Galata mi'aha ya guli ná,
 manda mamaha gha, káka ngha hənɲ. Ngha ta
 daghala mi'aha manda kwagha ma gha kul haɗ
 ndanantá sana skwi nda hənɲ.

Mi'a wadgu

³ Vla ta glaku ɲa vərɗaka mi'aha ka wadgu, ka
 matuɲulum. ⁴ Ka si mamu zwana tsa wadgu ya,
 ka zighihani a tsi katsi, tiɲəl hahənɲ dza'a zrafta
 katanɲá gwal ga taɲ, ɲa planamtá dzva taɲ. Tsaya
 skwi ta zdəganatá Lazglafta. ⁵ Tsa vərɗa wadgu ta
 nzakway ka matuɲulum kul haɗ mndu ɲa katanɲa
 ya ná, ta Lazglafta fafta tsatsi ta ghənɲani. Haɗ ta

† **4:13** Ngha ta Lukwa 4:16-21. * **5:1** Gray nda Levitik 19:32.

zlanjtá maga du'a, ka tawa ghəŋ da Lazglaftha nda fitik tani, nda rvidik tani, ŋa dawa katu da tsi wa. ⁶ Ama wadgu ya ta nzaku ta daghayakwani ná, nda mta tsaya dər má ta ndiri tsi. ⁷ Tsaya skwi dza'a ka havanaktá həŋ, kada nzakwa həŋ kul had rutsak ta həŋ. ⁸ Ka had mndu ta nghapta ka la taŋ, katkatatani la ma həga ga taŋ wu katsi, ɓliŋɓla tsa mndu ya ta zlgħay nda ŋuduf, mal tsatsi badzatani ka mndu kul zlgħaftá Yesu.

⁹ Marakw ya mtu zə'ala taŋ ná, ta magay ka imani ta mku' mbsak, kada mbədamta lu mataba mi'a wadgu. Tsa si turtuktuk yeya ka zə'al snaŋ tsi guli. ¹⁰ Ta ghubay ka lu ma ŋərma slnahani ta magə tsi. Va galanafgala katsi dīna ta zwani, ta tsu'ay katsi ta matbay ga taŋ, ta mbazay katsi ta səla gwal zlgħay nda ŋuduf, ta katay katsi ta gwal ta sa duni, fafa katsi ta ghəŋani ka maga inda ŋərma slna. ¹¹ Yaha ka mbədamtá mi'a wadgu ta ka daghali ma tsa mbsak ya, kabga bađu sli'avafta dva zgun ma vgha taŋ, ka dganatá həŋ nda Kristi ná, zbay taŋ ta dza'agəlta da zə'al. ¹² Dza'a ksay guma ta həŋ kabga ɓlanapɓla həŋ ta skwi ya si kura həŋ taŋtaŋ. ¹³ Taghəŋa tsa guli, had sana skwi ta magə tsi ta ghəŋa sli'ani da ra watgha həga ga mndu wa. Dza'a ra watgha həga ga mndu yeya a guli wu, dagala va yawa taŋ. Gwada kul nghanatá həŋ ná, tsaghuzlaram ka həŋ dida. ¹⁴ Tsaya tama, ta kumay yu ta sli'a mi'a wadgu ta ka daghali ya da zə'alha taŋ, ka yaya həŋ ta zwani, ka ngha həŋ ta həga taŋ, kada kwala ghumaha mu ta mna gwada kul raku ta amu. ¹⁵ Mamu sanlaha ta gi ghadata mbədaghutá vgha, ka zluŋjtá vərda tvi, ka

laghwi mista halaway. ¹⁶ Ka mamu sana marakw ta zlgħaftá Yesu, nda mi'a wadgu ma mndəra taŋ katsi, ka kata tsi ta həŋ, yaha tsi zlanantá Igliz, kada laviŋta Igliz ta katanťá vərđa wadguha ya ta dunluŋwaku.

Gwal ngha Igliz

¹⁷ La galata mndu ta ksa slna đina mataba Igliz ná, đina ka vla glaku dagala ŋa taŋ. Katkatatani gwal ta mna gwada, nda gwal ta tagha skwi ŋa mnduha. ¹⁸ Ka lu vindafta ma gwada Lazglafta na: «Hađ kuni dza'a hbunustá budzaŋ ta wi ta sla ta đga hya wu,» ka'a. Mantsa ya ka'a guli na: «Raŋra vlanťá nisəlani† ta mndu ta ksa slna,» ka'a. ¹⁹ Ma gi tsu'af ka ta gwada ta mnafta lu ta sani ma glata mndu ta ksa slna mataba Igliz. Ba mamu ka masləmtək tađ his ka hkən a tsi ta snanaghata. ²⁰ Gwal ta ga dmaku ya, dvanaghadvə ta həŋ ta kəma inda mnduha, kada ganafta tsi ta zləŋ ta sanlaha.

²¹ Ta ndəba dzvu yu ŋa gha ta kəma Lazglafta, nda Yesu Kristi, nda ya ta kəma duhwalhani zabap Lazglafta. Snasna ta tsa gwada ya, yaha ka da laghwi da đva ghəŋ. Yaha ka da gala mndu nda gala. ²² Yaha ka da gi hwaya fanaghatá dzvu ta ghəŋa mndu ŋa vlanťá slna mataba Igliza Lazglafta. Yaha ka da hba huta mista mndu ta gatá dmaku. Ngha ta ghəŋa gha, yaha ka faftá rutsak ta vgha gha.

²³ Yaha ka gđata ta sa imi kwenkwen, ama ka sa ka ki'a ta ima inabi, ŋa ghzla skwi ma huda

† **5:18** Ngha ta Vrafta ta zlahu 25:4 nda 1 La Kwareŋt 9:9, Mata 10:10, Lukwa 10:7.

gha, nda ya ɲa ghzla tsa gɔata ta gɔata ka kul dughwanaku ya.

²⁴ Sanlaha ma mnduha ná, ta daɓi dmakwa taɲ, dər ta la a lu tsanaghatá guma ta hən. Ama tahula tsanaghatá guma ta hən ta nghavata ɲa sanlaha.

²⁵ Manda va tsaya guli, ta nghaku ɲərma slna ta daɓi, dər má sabə a tsi ta daɓi gi hadahada wu, difaghuta a wa.

6

La vu'aha

¹ Inda gwal ta ga vu'a, ka vla hən ta glaku ɲa danahəgaha taɲ, kada kwala mnduha ta raza Lazglafta, nda skwiha ya ta taghə mu. ² Ka gwal zlghay nda ɲuduf na danahəgaha taɲ katsi, yaha hən da kwal kul sna gwada da hən, kabga nzakwa taɲ ka zwanama ma zlghay nda ɲuduf. Ka ɲavaɲa hən katək ka maganatá slna taɲ nda tvani, kabga tsa danahəgaha taɲ ta maganata hən ta slna ya ná, gwal zlghay nda ɲuduf ta dvu Lazglafta hən.

Ma tsemi ta saba inda ghwadaka skwi

Tsaya skwiha ɲa taghay gha ɲa mnduha. Ka vla ka ta mbraku ɲa taɲ. ³ Ka lagha mndu ka tagha sana skwi tskəm, ka zluɲtá vərɔaka gwada Mghama mu Yesu Kristi, nda skwi ya ta taghə mu ta ranɲtá zlghay nda ɲudufa amu katsi, ⁴ tsa mndu ya ná, gla ghən ta glə tsi, had sana skwi snaɲ tsi wa. Dughwana a ma ndanani wa, zlərɔutawi nda mbaɔa gwada yeya snaɲ tsi. Ma tsaya ta saba drakuha, nda zlərɔutawi, nda razuha, nda ghwadaka uwa'uwalakuha ⁵ nda zlərɔutawi kul kdavakta mataba gwal kul had ghunislak ma

ghəŋa taŋ. Snəgla a həŋ ta kahwathwata wa. Dina ná, skwi ŋa mutsa gadghəl ya ka hahəŋ ta ndanay.

⁶ Manda va tsaya nzakwani, dina ná, mghama gadghəl ya, ka ta rfu mndu nda kuraghuta skwi ya da tsi. ⁷ Aŋ mndani, had sana skwi ya klaganam mu da ghəŋa hadik wa. Manda va tsaya guli ná, had sana skwi ya dza'a klin̄ta mu guli wa. ⁸ Tsaya tama, ka mamu mu nda skwi ŋa zay, nda skwi ŋa suday ta vgha ya ná, prək mu nda tsa. ⁹ Ama gwal ta zba nzaku ka gadghəl ná, ta dədəmdədə həŋ da skwi ta dzəgha mndu. Ŋa dədəm̄ta taŋ da dəbla ghwadaka mnduha ta badza mndu, nda ya ta zadanatá mndu ŋa dekdek. ¹⁰ Dvutá tsemi ná, ta klakkla ta slrəŋa inda ghwadaka skwi. Ma tsa dvuta taŋ ta tsemi ya, ka zlanavatá həŋ ta zlghay nda ŋudufa taŋ, ka garaḅ tsi ta həŋ katakata.

Vərđaka vula zlghay nda ŋuduf

¹¹ Ama kagha mnda Lazglafta, wara ta tsa skwiha ya. Ka zba ka ta tva nzaku tdukwa, nda tva ndi'anavatá vgha ta Lazglafta, nda tva zlghay nda ŋuduf, nda tva dvutá mndu, nda tva ksa ŋuduf, nda tva nzaku leḅtekwa guli. ¹² Lma ta vərđa lma zlghay nda ŋuduf. Zak za ta hafu ŋa kdekeden, kabga hgafha Lazglafta ta kagha ta ghəŋani ma mnaŋta gha ta ŋərmata zlghay nda ŋudufa gha ta kəma ndəghata masləmtsəkha. ¹³ Ka yu ta mnaghata ta kəma Lazglafta ta vla hafu ŋa inda skwi, nda ya ta kəma Yesu Kristi ta mnigin̄tá vərđa gwada ta kəma Pwanəs Pilat* ná, ¹⁴ ka ŋanata ka ta na gwada ta mnaghata yu na. Ka nzata ka kul

* **6:13** Ngha ta Yuhwana 18:36-37, 19:11.

had sana skwi ta kagha, kul had rutsak, ha ka sagha fitik dza'a kəl Mghama mu Yesu Kristi ka maravata. ¹⁵ Dza'a maravamara badu fitik ya tsaf Lazglafta. Da tsa Lazglafta ya inda mbraku. Tsatsi Lazglafta turtuktuk. Tsatsi dzuḅaya zdaku. Tsatsi ta ga Mgham ta ghəŋa mghamha†. Tsatsi mgham ta malaptá mghamha. ¹⁶ Tsatsi turtukwani kul had ta mtavata, ta nzaku ma tsuwadək kul laviŋtá mndu ta ḅhanavata. Had mndu ta kdə nghanṭa wa. Had mndu dza'a laviŋtá nghanṭa‡ guli wa. Nani glaku, nda mbraku, ṅa kdəkedzeŋ. Amin!

Vlanṭá hidaku ta gwal ka gadghəl

¹⁷ Mnanamna ta gwal ka gadghəl ma na ghəŋa hadik na, yaha həŋ da ghərbaku, yaha həŋ da laghwi da faftá ghəŋa taŋ ta gadghəla§ taŋ ya dza'a kwal kul nzdavata. Ta Lazglafta ya ta vlamatá inda skwi ka haslay ṅa nzakwa mu nda rfu ka həŋ faftá ghəŋa taŋ. ¹⁸ Mnanamna ta həŋ ka maga həŋ ta zdaku. Ka sganaghata həŋ ta maga skwiha dīnadīna. Mnanamna ta həŋ ka muvla həŋ ta muvla, ka vla həŋ ta skwi ṅa katanṭá sanlaha nda tsi. ¹⁹ Ka mantsa ya ka həŋ magay, dza'a tskanatska həŋ ma ṅərma vli ta skwiha taŋ, ṅa slafta taŋ tida badu mahtsim*, kada mutsafta həŋ ta vərda hafu.

Dzatá ghəŋa gwada

²⁰ Timute da, dasuwa ka ka ṅanatá skwi ya fagham Lazglafta ma dzvu. Ma fam ka ta wa gha da gwadaha ka bətbət kul gra vgha nda zlghay nda

† **6:15** Gray nda Vrafta ta zlahu 10:17, Zabura 136:3. ‡ **6:16** Gray nda Zabura 104:2, Sabi 33:20, Yuhwana 1:18. § **6:17** Gray nda Lukwa 12:20. * **6:19** Gray nda Mata 6:20.

ɲuduf, nda tagha skwi ya ta mnə lu kazlay: Snaɲtá skwi kə'a ya, tsaw tsakalawi ya. ²¹ Ma famtá ghəɲ ka tagha tsa skwiha ya, kəl sanlaha ka Pak zlgəhay nda ɲuduf. Ka nza zɔakatahuda Lazglafta nda kaghuni!

Deftera Lfida Dzratawi New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 11 Nov 2022 from source files
dated 29 Jan 2022

f257b780-c0dd-5cce-9b20-430484439898